

那文毅公奏議

那文毅公初任陝甘總督奏議目錄

卷八

恭謝

天恩

陝省教匪善後事

酌留防兵
遣散游民

緝捕零匪

安鄉勇以置新兵

卷九

緝訊逆匪

稽核軍功頂戴

核實軍需平餘

蒙古行鹽

調撥哈密馬匹

議駁監糧

請緩城工

請仍驛路之舊

恭報回甘

容安謹按嘉慶九年六月 先公奉

命署理陝甘督篆駐劄陝西籌辦三省教匪善後事宜陝
西地方事件雖與制府會銜多係中丞主政甘
肅雖以制府兼攝巡撫維時 先公駐劄陝西

未至蘭垣地方事件奏委蔡方伯廷衡代辦及
至抵甘不旬日卽奉

命調任兩廣總督故此任奏議內未載刑錢章奏

那文毅公初任陝甘總督奏議卷八目錄

卷八

恭謝

天恩

陝省教匪善後事

酌留防兵
遣散游民

緝捕零匪

安鄉勇以置新兵

那文毅公初任陝甘總督奏議卷八

男容安恭輯

恭謝

天恩

嘉慶九年六月十八日

命署陝甘總督

嘉慶九年六月十八日軍機大臣字寄奉

上諭那彥成等奏訛據原任嵩縣知縣周書同審訛王永
安呈控王雷等編造妖言邪說一案已降旨令馬慧裕
嚴行審辦矣本日據蔡廷衡奏總督惠齡患病身故懇

請簡員補放陝甘總督事務殷繁現值搜捕餘匪籌辦
善後事宜均關緊要一時簡放無人著那彥成前往署
理卽由工次馳驛赴陝與方維甸面晤籌辦一切如有
應行會辦之事卽暫駐陝省接印任事俟餘匪肅清散
遣鄉勇諸務經理妥協那彥成再赴蘭州辦理本衙門
事務

嘉慶九年六月二十二日

奏爲恭謝

天恩事本月二十二日准軍機大臣字寄嘉慶九年六月

十八日奉

上諭陝甘總督著那彥成前往署理卽由工次馳驛迅速

赴陝欽此

臣

當卽恭設香案望

闕叩頭恭謝

天恩伏念

臣

識淺才疎仰沐

殊仁再任尚書屢勉趨公涓埃未効茲復荷蒙

恩旨署理總督聞

命自

天感激無地查陝省現在辦理善後事宜撲拏零匪散遣

鄉勇在在皆關緊要甘省爲邊疆重寄事務殷繁

伏思

臣

初膺外任諸多未諳惟有仰懇

皇上天恩隨時隨事

指授機宜

臣

勉竭愚誠遵循辦理庶得事事妥協以期仰

副

高厚鴻慈於萬一

臣

拜摺後卽於次日自豫起程馳赴陝

西與方維甸面晤如有應行會辦之事卽遵

旨暫駐陝省接印任事再

臣

奉到

諭旨內

硃筆令

臣

迅速前往

臣

右腿舊染風濕近日復發膝蓋筋

脹骨軟每日行走只可二百餘里查河南至西安

省城一千四百餘里

臣

儘力加緊行走約計七八

日必可到省任事謹

奏奉

硃批近日各部事件廢弛甚多不得不加整頓水懦民玩誠朕之過亦庸碌諸臣必欲朕負嚴刻之名奈何其善體朕意察吏安民毋負知遇勉之

嘉慶九年七月二十一日

奏爲恭繳

硃諭敬陳感激下忱事竊

臣

本月十一日奉到

批摺內

硃諭諭那彥成知任官唯賢得人則治陝甘重鎮外接新

疆非公正廉明不能率屬非精明強幹不能治民以誠
信馭番回以清介示僚吏讞獄不厭精詳練兵必求精
銳汝誠國家柱石之臣有爲有守惟有稍恃已之聰明
不求人之謀議夫一已之才力有限仕途之叩壑難窮
務資兼聽並觀之益莫爲掩耳盜鈴之事汝雖署理卽
同實授莫存五日京兆之見當體朕用人之苦衷不可
固辭近日已有旨命汝仍入軍機原無用汝外任之意
孰意此缺忽出內而大學士尚書外而督撫竟不得人
不得已命汝署理汝應勉力辦事毋負委任方維甸深
可信任朱勲蔡廷衡皆有才幹堪爲輔助慶章才識可

用惟守之一字未可深信汝密識於心從容察看此旨
卽行抄寫時刻瞻觀大有益處殊諭卽行繳上特諭欽
此臣跪讀之下感激涕零伏念臣年輕世僕毫無
知識仰蒙

皇上再造深仁棄瑕

委任不期又奉

旨署理陝甘總督臣自念向年備職京員未曾外任深恐
不能勝此重寄有負

聖主造就之恩但陝省現當辦理善後事宜臣年力有餘
正當學習上進且渥承

眷遇問心亦難於推諉是以

臣謝

恩摺內並不敢言辭任迨到陝後接

臣

兄那彥寶來信蒙

垂念

臣

母卽令迎養來署

臣

雖糊塗尚有血氣心知如此

淪肌浹髓之

恩不知報稱何以爲人在

臣

亦自決意受任不敢存五日

京兆之見惟有勉竭血誠力圖報効又恐才識短淺少所聞歷正在茫無定見之時恰蒙

特頒訓諭教以大臣之體指其氣質之偏示以僚屬之賢

否

臣

至愚極陋但能凜遵

聖訓卽可倖免愆尤至蒙

天語褒嘉益令臣慚懼交並汗顏無地竊念臣自當差以

來事事仰賴

恩主教誨成全不過謹慎小心苟求無過茲復荷

至仁垂教

指示周詳臣除將奉到

硃筆敬謹繕繳外仍朝夕瞻拜捧讀時時事事細繹

聖言俾得有所儆惕不敢少自放佚總期改過盡誠以圖

後效至方維甸與臣自幼熟識爲人辦事彼此素

所深知此來互爲勸勵規戒相期併力齊心將現

在調停新兵裁撤鄉勇諸事宜已誤者悉心更正

現辦者務善其後必求永遠安定方爲不負

委任臣自幼在

內廷參養多年一旦遠違

丹陛不惟遇事無所欽承五夜自思亦不圖今日身爲外

臣言念及此益令大馬戀

主之忱刻縈寢食

君門萬里瞻慕情深惟有叩求

仁恩容臣將善後事宜辦理完竣二三年後

簡放得人換令回京得日近

天顏長承

教澤此臣萬不敢希圖之事實臣刻不能忘之心

天高地厚之

恩實如家人父子臣不揣冒昧直陳惟求

聖恩俯賜鑒察謹

奏奉

硃批每日所行之事不論鉅細先以毋欺爲主是非須容人講論是着行之非者置之勉此數語思過半矣

嘉慶九年八月十四日

奏爲恭繳

硃批

諭旨叩謝

天恩事竊臣前奏恭謝

天恩一摺欽奉

硃批近日各部事件廢弛者多不得不加整頓水懦民玩
誠朕之過亦庸碌諸臣必欲朕負嚴刻之名奈何其善
體朕意察吏安民毋負知遇勉之欽此臣跪誦之下仰
見

皇上行政用人時縈

宸念以臣愚陋實不足仰副

高深然自幼依侍

丙廷敬維

聖主日理萬幾一秉大公至正因才

教養

天地爲心常荷包容博覆之

恩從無刻覈苛求之事卽諸臣中偶有才德不能兼備氣

質不無偏倚者俱上煩

聖恩教誡委曲成全以期才歸有用此實

聖量含宏亦可見得人之難而

聖人用人爲更難也

臣仰承

恩遇驅使有年得以少增知識今恭讀

睿訓始知爲政之本惟在用人果得其人則政事易舉

臣

自維才具庸愚

恩深識淺然年力方強果能仰體

天心以副

寬仁大德可以永遠承受

天恩卽係

臣

糊塗造化又欽奉

硃批諭旨每日所行之事不論鉅細先以毋欺爲主是非
須容人講論是者行之非者置之勉此數語思過半矣

欽此仰蒙

聖諭教

臣

以戒欺求慊之功以收虛衷集益之效感激欽

佩惴忱莫能名狀伏念臣仰蒙

皇上撫育深恩自當差以來每以毋欺自勵遭遇

聖主若果欺飾摸稜不求上進早自難逃

洞鑒之中惟臣下愚之性遇事操之過急往往似不能容

物實非敢出之有心茲蒙

聖慈諄諄教誡自係臣躁矜未釋氣質未平惟有恪遵

訓諭時刻警惕不敢稍存自是之心至地方公事無論鉅

細均關

國計民生臣細心體認竊以爲事之大者尚屬共見共

知若事小或有疎畧往往因毫末之微肇成大釁

言念及此誠日日在兢持惕勵之中臣雖竭盡心力猶覺無以上酬

恩遇下對軍民夙夜愧懼方深不惟不敢自是亦且無識無才不暇自是茲蒙節次

訓諭臣惟有敬謹錄出時時恭閱不啻親承

提命日侍

天顏敢不竭盡愚忱勉益加勉以冀仰酬

教養成全至意再臣前奏令臣長子容安照例隨從欽奉

硃批准其隨任咨明本旗從來受恩易報恩難其勉之

此竊臣仰蒙

格外鴻慈令將臣母迎養來署已屬逾格

體卹茲復

准令臣子隨侍前來俾資長途奉養舉家頂感迥逾尋常
謹照例咨明本旗並將節次奉到

硃批敬謹封繳謹

奏

嘉慶九年九月十一日

奏爲恭謝

天恩事竊臣接閱邸抄恭讀

諭旨前因查辦戶部寶泉局虧短銅觔一案那彥成任內

收銅五運著降三級從寬留任欽此伏念臣仰荷

聖恩委任經理錢法自嘉慶八年五月初八日至七月初

七日奉差樂亭縣審辦案件兩月之間適值運到

五運銅觔是以任內共收五運雖臣暫時署理未

能深悉情形然究係失於查察咎無可辭乃蒙

皇上鴻施不加重譴僅予降三級從寬留任荷

包容於格外寬宥夢想所難期臣跪誦之餘感愧悚惶莫能

名狀嗣後惟有隨事隨時實心體察不敢稍存懈

忽以仰副

聖主曲賜矜全之至意謹

奏奉

硃批所繳批並奏摺俱留中時覽務期言行相符時刻小心勿自作聰明不納人言汝才識俱佳祇恐自是切記朕言必成大器勉之

陝省教匪善後事

酌留防兵
遣散游民

緝捕零匪

嘉慶九年七月初八日會同陝西巡撫方公維甸

奏爲會商辦理情形事

臣那彥成於豫省差次接奉

諭旨仰蒙

皇上天恩署理陝甘總督當卽星馳就道於七月初二日

行抵陝西與

臣方維甸會晤詢據探報川境一起

零匪由太平地方東竄大寧楊遇春派兵截勦在

龍頭寨殺賊數名賊匪隨奔往柴扒山藏匿額勒

登保賽冲阿等分路帶兵往勦賊已先遁經額勒

登保等分路追截已向西南折竄聞額勒登保德

楞泰俱在軍營患病昨據糧員稟報額勒登保較前稍愈現已力疾帶兵德楞泰在高坪緩養數日痢已漸止楊遇春亦因傷發紅腫兼患瘡瘍近日疼痛稍爲輕減秋令已交暑濕漸退額勒登保等病症自可調理就痊至地方委員搜捕零匪情形經_臣方維甸向_臣那彥成詳細告知現在黑河地方較前漸就靖謐金雞河一帶報有搶掠之案已調通判維昂前往與道銜知州陳祁分投查緝並飭臬司朱勳酌赴各路督率查拏仍留委員在黑河山內嚴搜毋任稍有疎懈查黑河迤西與甘省

之秦階地方毗連數月以來查拏緊急目下雖匪踪斂戢尚恐其遁往甘省邊境臣那彥成復飛飭鞏秦階道朱爾漢督率地方官一體緝捕務使零匪無從竄匿以期盡絕根株其餘一切事宜尚須公同商辦俟臣那彥成與臣方維甸酌籌具奏後再行遵

旨前赴甘省所有總督關防經藩司蔡廷衡令中軍副將劉管城等齎送前來臣那彥成業於初六日接印任事謹

奏

謹按嘉慶九年七月十六日廷寄內奉

上諭那彥成等奏其餘一切事宜須公同商酌者亦著妥議具奏

嘉慶九年七月初八日

奏爲體訪兵力賊情酌籌辦理事竊額勒登保等所辦

零匪未能殲事

臣

此次來陝細加訪察緣此股餘

匪自去年秋間竄至漢南在川陝邊界老林往來

潛匿該處東西一二千里南北數百里與太平關

縣大寧一帶相連在在皆深林密箐路徑亦陡仄

異常賊匪倚恃險阻輾轉奔竄官兵深入窮追帶

兵大員皆能不辭勞瘁然賊匪狡詐百出賊愈熾而兵愈疲依舊不能得手遲延之故實由於此額勒登保等奉

命專征當此屢蒙

嚴飭之時親身督催設法鼓勵官兵入林兜剿斷不敢爲更張之請若果能得一二次痛仗固可卽時殄滅但賊情詭詐裹脅日增賊數衆多勢必分股以便分路搶掠又可牽綴官兵現在官兵雖有萬餘力已疲乏若再分路趕追更無休息之時奔走窮山先已自困不但不能制賊且恐賊匪偵知我兵疲

敝乘間逸出林外或奔楚境或渡漢江各處山內
土棍匪徒乘機附和實爲可慮臣愚昧之見宜急
分戰備之任以爲休息兵力之計即使戰事稍遲
亦斷無蔓延之患查現在賊數不過數百以十圍
五攻而論勁兵不過數千卽敷勦捕額勒
楞泰等打仗奮勇實心爲

國久在

聖明洞鑒之中應請

勅下額勒登保德楞泰派委將軍提督大員各帶兵丁分
駐川陝老林之外於賊近之時探踪迎擊若賊在

老林藏匿不必窮追藉以休息兵力額勒登保德
楞泰等另派奮勇官兵往來川陝相機探踪入林
搜勦如額勒登保德楞泰等所帶之兵稍疲卽可
於川陝分駐兵丁內更調抽換庶兵力更番休息
養其銳氣川陝老林之外亦有預備不至闌入楚
境偷渡漢江似於軍務有裨臣管見所及專摺具
陳謹

奏

謹按嘉慶九年七月十六日廷寄內奉

上諭據那彥成另摺具陳兵力賊情請分戰備之任無庸

專事入林搜剿一節此則非是川境山內零匪雖節經
搜捕不過數人至一二十人其大夥股匪總未痛加殲

殊

之久尚得謂之稍催促急乎

戮現在屢次飭催帶兵大員等尚不能尅期殲事若明
諭以在邊隘防守一任賊匪潛匿老林東奔西竄無人

追捕勢必裹脅日增何時始能辦淨况川陝邊界老林
東西一二千里南北數百里在在有路可通若欲到處
駐兵防守安得如許兵力沿邊布置設稍有未周必致
賊匪乘間竄出仍不能制其死命於事何益那彥成此
議不可令軍營帶兵人員聞知致有鬆勁也

嘉慶九年七月二十二日會同陝西巡撫方公維

旬

奏竊查川陝零匪經我兵痛剿所剩祇二百餘人如再連得一二次勝仗不日即可蕝事臣等不勝欣喜盼望之至但成股零匪全平將來議撤大兵陝省仍請酌留二三千名尤須聲威素著大員帶領在各邊隘之處巡查駐劄以資彈壓約須半年以後方可以次撤動雖鹽糧不無小費然事關機要且有調劑各營新兵約束已散鄉勇等事得此兵威鎮服於全局大有裨益謹

奏

嘉慶九年八月初二日軍機大臣字寄奉

上諭那彥成等奏將來議撤大兵陝省仍請酌留二三千名尤須聲威素著大員帶領彈壓一節自應如此辦理指日零匪全平邊隘均須防守屆時或將遠省客兵先行裁撤其陝甘本省之兵不妨稍遲歸伍此次額勒登保將次回至西安那彥成等可面向籌商應將何營兵丁酌留若干名並於鎮將大員內應留何人帶領如何分駐巡查彈壓之處妥議具奏

嘉慶九年八月初六日會同陝西巡撫方公維甸奏爲探明官兵追剿零匪分別遣撤鄉勇安靜情形事

竊^臣等前將官兵勦賊大獲勝仗情形奏蒙

聖鑒連日復據探報該匪自鳳凰寨痛勦之後勢漸窮蹙
隨由平利馬鞍山向金子臺一帶北竄德楞泰帶
兵自黃墩一帶探踪追截賽冲阿楊遇春馬瑜等
分路緊追並有分出零星匪三四十人在川境小垭
子老林藏匿等情^臣等以零星匪經此次痛勦之後
誠恐四散奔逃嚴飭興安漢中地方官如賊匪零
散務卽實力稽查搜緝毋使漏網逃竄所有來陝
各路官兵糧餉已飭令分投運供源源接濟前赴
川省採買之米項據委員岐山縣知縣郭立誠等

硃

稟報在順慶等處買米一萬石七月十八日已起
運米四千八百石約計八月底可至漢中儲備充
裕可以接至新穀登場軍食無虞缺乏至山內匪
徒除節經搜獲之外現又據署郾縣知縣高甲稟
報該縣典史金大典拏獲搶奪匪犯方老么一名
又遊擊張聯奎委員屠大琮稟盤獲匪徒王文光
一名又張聯奎稟報拏獲匪犯李雲華一名現在
飭司覆訊分別辦理其黑河一帶復拏獲匪犯黎
秀清一名現飭地方文武員弁會同委員嚴緝陝
甘兩省併力搜查自可漸次淨盡謹

仰

傳

奏

嘉慶九年八月十六日軍機大臣字寄奉

上諭那彥成方維甸奏探明官兵追剿零匪各情形一摺
覽奏俱悉賊匪自鳳凰寨被官兵痛剿之後竄入化龍
山老林復折向八百溪一帶老林奔遁前據德楞泰奏
到賊勢益形窮蹙狂奔散匿現已督飭賽冲阿楊遇春
及鎮將等分投扼剿不日自可悉數掃蕩至南山匪徒
前方維甸每次奏報搜捕情形自數十名至十數名不
等此次各路搜獲者祇有四名可見零匪漸形稀少惟
是從前賊匪成股突竄官兵得以躡踪兜擊此時情急

四散隨處潛藏卽如摺內稱有分出零賊三四十人在川境小垵子老林躲匿今德楞泰督兵分路緊逼恐該匪等一被擊散潛向陝境山林分竄賊目苟朝九苟文潤難保不變易姓名溷迹零星殘孽中希圖倖免那彥成方維甸當通飭地方營弁及各寨堡等一體留心緝捕淨盡而於首要各犯尤應嚴密偵查務獲毋任漏網如果能將苟朝九苟文潤拏獲無論文武官弁及兵勇民人均著照前定賞格賞給示獎且卽屬那彥成方維甸之功不可不加意督緝也

謹按嘉慶九年八月十四日會同陝西巡撫方

公維甸

奏連日據軍營探報零匪被官兵兜剿勢更窮蹙首逆
苟文潤已被軍功趙洪周投入賊營刺殺餘匪晝
伏老林夜間潛出摘食包穀經楊遇春伏兵截於
隴頭寨殺賊數名將賊衝爲兩段丟棄器械衣物
甚多隨分起由太平寨馬黃壩等處狂奔官兵緊
躡窮追沿途復有斬獲等語臣等查覈所探情形
零匪卽日可期淨盡第恐紛紛渙散或致潛匿稽
誅此時搜緝查拏尤爲緊要臣等已飛飭興安一
帶各地方官併力齊心鼓勵寨勇等隨地擒捕一

有所獲卽優加獎賞總期剋絕根株毋使一名漏網方爲妥善謹

奏奉

硃批實心勉力緝拏餘匪

嘉慶九年八月二十七日會同經畧大臣額公勒登保陝西巡撫方公維甸

奏爲遵

旨會籌善後分別酌留官兵分段駐守巡查鎮撫及現在殘匪零星南奔擬先行凱撤西南防兵事竊臣額勒登保欽奉

上諭前據那彥成等具奏大兵議撤時陝省尚須酌留二
三千名並聲威素著之大員帶領暫駐已降旨令與額
勒登保妥爲籌辦本日額勒登保摺內稱陝省現有防
勦官兵一萬四千名瞬屆撤兵之時著卽於此內派留
精兵數千名以資彈壓其應如何酌派大員駐守巡查
鎮撫之處額勒登保與那彥成方維甸面晤之時正可
妥爲議定具奏欽此茲臣額勒登保於二十日行抵西
安與臣那彥成方維甸會晤連日遵

旨妥爲商辦伏查陝省邊界東西綿亘數千里防範必須
周密是以臣額勒登保酌定共留防兵八千餘名

又賽冲阿楊遇春現帶勦兵五千六百餘名共計防勦官兵一萬四千餘名均係陝甘兩省官兵

奏蒙

聖鑒在案現接德楞泰來信連日分投搜勦所有潰入川界之五六十人經馬瑜派兵搜勦擒斬二十多人剩匪不過二十餘人三五零星已深入川境馬瑜田朝貴等督兵緊躡而前其逃入化龍山之六七十人亦二三十人十數人爲羣四散藏匿向羅筐溝楊道士溝分逃有南入川境之勢賽冲阿楊遇春派兵搜緝亦有斬獲德楞泰現在川陝邊界親

督搜緝卽日可期辦竣等語各地方官稟報亦屬
相同據此情形指日卽可肅清邊界已臻靖謐所
有陝省防勦官兵現在卽應分別酌撤以節鹽糧
將來更應酌量留防以資鎮撫臣等公同悉心商
酌查寧河一帶接連川甘爲陝省門戶本派總兵
國興阿副將吳亨衍遊擊德忠帶領寧夏涼州甘
州各營官兵四千餘名分段防範又紫陽之毛壩
關一帶毘連川界亦分駐延綏官兵一千二百餘
名巡防搜緝現在該一帶久經靖謐距匪踪亦遠
所有此項官兵自應先行凱撤但全數撤完又恐

漢中寧河一帶城池營汛未免空虛且漢中屬各營官兵多有在楊遇春一路隨同搜勦地方甫有趙恒裕等謀逆之案亦不可無兵巡查彈壓茲擬於寧夏官兵內酌留一千名協防漢中寧羌一帶地方其餘寧夏涼州甘州延綏官兵四千七百名卽行凱撤分起回營尚剩防勦官兵一萬名一俟德楞泰搜捕完竣馳奏捷音大兵議撤之時再行查照臣那彥成方維甸前奏酌留官兵以資彈壓惟是邊界綿長巡緝必須周密前奏酌留官兵二三千名恐尚不敷分撥茲臣等悉心籌商應俟賽

冲阿楊遇春帶領勦兵議撤時將各官兵通行挑
派將平素得力之固原提標屬兵酌留一千二百
名河州鎮兵八百名陝安鎮兵八百名共計陝西
本省兵二千八百名再於甘省西寧鎮兵內酌留
八百名寧夏鎮兵內酌留五百名共留防兵四千
一百名其帶領鎮將查陝安鎮總兵王兆夢係屬
本轄地方應留防邊界並隨時辦理本鎮營務再
酌留西寧鎮總兵九十帶領本鎮官兵至將領內
應酌留副將閻俊烈吳廷剛吳亨衍三員叅將祝
廷彪李朝顯二員遊擊廖世俊馬隆伊星阿馬良

棟楊得陞張起鰲六員都司柯連仲馬仕相祁祥
宋鉞曹良臣王殿甲朱保呂天俸八員以資分帶
官兵楊遇春係本省提督聲威素著且能得兵民

硃

之心應留該提督統領其分段駐守鎮撫之處必
須在於三省交界要隘地方臣額勒登保曾於上

年具奏三省提鎮會哨章程一摺仰蒙

皇上勅部議准行知在案因大兵未撤尚未舉行茲臣等

查照酌覈現在陝省南界之東接連川楚最關緊
要應於所留官兵四千一百名內令西寧鎮總兵
九十帶本鎮兵八百名駐劄安康紫陽屬之南天

門漳河坪一帶巡緝彈壓常川搜捕卽與川省之
太平官兵會哨令陝安鎮總兵王兆夢副將閻俊
烈帶領本鎮兵八百名駐劄平利屬之八仙河一
帶巡緝彈壓常川搜捕卽與楚省二竹川省大寧
官兵會哨尚有官兵二千五百名卽交楊遇春帶
領在西面西鄉漢中一帶分派將領擇要分駐巡
緝鎮撫與川省之廣元通南江一帶官兵會哨常
川搜捕並督飭九十王兆夢兩路搜緝該提督一
面在漢中西鄉整飭新設營制訓練新兵以期兩
有裨益其次應撤防勦滿漢馬步官兵五千餘名

均隨賽冲阿全行分別撤回各原營歸伍其楊芳
所帶防江官兵一併撤回將六成勦兵鹽糧卽行
停止查照臣額勒登保會同前督臣惠齡原奏馬
二步八營制辦理惟該鎮兵丁數年以來常川在
外搜勦防守尚未能歸伍按照馬戰守糧分晰定
額凱撤回營之日卽應照辦除馬糧二成業經奏
准外步糧八成應以四成作爲戰糧以四成作爲
守糧查明撤回兵內如係鄉勇入伍著有勞績及
年力强壯之人應均勻分派以馬糧戰糧拔補設
有不敷卽以本地招募者挑揀足額其餘仍歸四

成守糧作爲定額庶各兵丁知有等差自必各自
奮勉嫻習紀律以圖次第拔擢更足以收束身心
至外省鎮將如南贛鎮總兵喜明山西叅將哈豐
阿等亦均一併凱撤楊遇春率同王兆夢九十統
帶暫留官兵隨時往來督飭搜緝統俟明年各處
山林委無伏匿零匪地方實在全臻靖謐臣那彥
成方維甸再行察看情形奏

聞撤交楊遇春帶領回營嗣後再照臣額勒登保

奏定章程令提鎮等於春秋兩季會哨俾邊界永臻鞏

固謹

奏

嘉慶九年九月初四日軍機大臣字寄奉

上諭額勒登保會同那彥成等奏酌留官兵分段駐守及
先行凱撤西面防兵各情形一摺覽奏俱悉陝省邊境
一帶卽日零匪肅清自當留兵鎮撫前經諭令會商籌
辦茲據奏稱俟賽冲呵楊遇春帶領勦兵議撤時通行
挑派共酌留防兵四千一百名交各鎮將等分段駐守
仍留提督楊遇春統領所辦皆是但山林潛竄餘匪節
經搜捕將次淨絕此時留兵分駐原因地方甫靖或恐
尚有伏而未起之匪徒須藉兵力彈壓使知畏懼日久

自可潛消倘奉行不善弁兵等或有意邀功必致藉搜查爲名擾害良善濫殺無辜迨至查訊明確問閹已受其累且又須將妄拏之弁兵正法治罪豈非徒滋刑獄殊有關係現在額勒登保卽日回京著那彥成方維甸通飭該鎮將曉諭弁兵等各於界內留心防範如有逆跡已萌似前此拏獲之趙恒裕者自當上緊嚴緝或實有形跡可疑之人亦應一律盤詰固不可稍有疎縱亦不可任令貪功滋事此爲最要至會哨一事不但此時卽應舉行竟當按照章程永遠遵辦以鎮邊陲那彥成等亦當飭知該鎮將實力奉行毋致日久生懈

嘉慶九年九月初四日會同陝西巡撫方公維甸
奏爲三省全功告蕝敬陳歡忭下忱事竊_臣等接准德

楞泰咨會知餘匪全數掃蕩三省大功已蕝業於
八月二十八日由六百里馳奏捷音並咨送摺稿
前來_臣等恭誦之餘無任欣忭伏思此項零賊一
載以來在川陝邊界往來奔竄依恃老林苟延殘
喘我

皇上宵旰焦勞盼捷至爲殷切仰蒙

睿謨指示機宜懸立重賞用是窮搜林箐士氣奮揚將大
小賊目羅思蘭等次第殲擒首惡苟文潤又爲趙

洪周殺斃獻功賊黨內離奔逃無路茲復連得勝
仗苟朝賢王添詔等悉行斬獲餘氛殄滅捷音馳
報慶洽敷天臣等職司守土適際功成慶幸忭舞
下忱莫能言喻此後綏輯閭閻安戩除莠在在均
關緊要臣等惟有督率地方文武將善後一切事
宜妥爲籌畫務使民皆復業永享

昇平以仰副

聖主保大定功安民求治至意謹

奏奉

硃批培養元氣全在卿等督飭有司實心經理勉之

嘉慶九年十一月二十六日會同陝西巡撫方公
維甸

奏爲寧陝及漢南各鎮協營新兵借項置買地畝酌籌
辦理情形事竊_臣等前奏調劑寧陝新兵案內擬
請仿照屯田之例寓兵於農量爲置買地畝以備
每年添補兵糧之用經軍機大臣議奏以事屬可
行令_臣等詳細籌議奏

聞其動用銀兩一併酌籌款項奏明辦理_臣等伏查南山
及漢南地方山大林深藏奸最易欽奉

特旨於南山內設立寧陝鎮營招募新兵六千名並於漢

南陝安鎮漢中協舊有鎮營增添營汛新兵二千六百一十七名

審慮周詳所以鎮撫嚴疆者至爲深遠又因寧陝鎮處萬山之中食物昂貴與陝安相同一律加給米折等銀

恩施已極優渥臣那彥成到陝與臣方維甸體察寧陝新兵情形多係無業鄉勇應募入伍之人性情桀驁如或衣食拮据未免約束爲難果能生計充餘訓練可成勁旅

奏請置買寧陝鎮營兵丁地畝添補兵糧以爲安輯久

遠之計仰蒙

聖慈允准當卽劄行該鎮宣布

聖恩寧陝新兵頂戴歡呼安分守法較前已爲安貼現已
並無逃伍之人惟漢南陝安鎮漢中協各標營新
兵亦多由鄉勇募充本年入伍之勇均派歸漢南
各營自不便與寧陝稍有歧視應將陝安鎮營漢
中協營並陽平關寧羌畧陽等處新兵與寧陝新
兵一律置買地畝俾裕生計查兩鎮一協及提標
陽平關等三營除各營舊兵外通共

奏明添設新兵八千六百一十七名無論馬兵及步戰

各兵每兵一名給予十兩價銀之地共應需銀八萬六千一百七十兩此項銀兩若動用各營徵贖馬乾銀兩徑請開銷未免糜費若先動

帑項再於置買地畝抽存糧石變價歸款又恐年歲豐歉不齊難以按年清還日久或致懸宕臣等公同商酌山內各營雖經議准額設二成馬兵然山徑崎嶇用馬不能得力前次籌議新兵分例卽將緩買一成馬匹將節省馬乾銀兩加增米折今請將二成馬匹全行緩買卽以節省馬乾銀兩歸還借動買地之項計自本年十二月起至嘉慶十一年

六月止以一成加增米折以一成扣歸買地借款
至十一年七月停止加增米折後卽將節省二成
馬乾悉數扣繳前後約計至嘉慶十五年冬季總
可將借項全數扣完如此通融辦理以各該營馬
乾籌補該營買地之用庶

帑項不致虛糜兵食益臻充裕現當農隙之時民間售
地者較多飭司於本年地丁項下借支銀八萬六
千一百七十兩交寧陝總兵楊芳陝安鎮總兵王
兆夢漢中協副將唐文淑等趕緊置買提臣楊遇
春本在漢南亦令就近督率統俟各營置買齊全

再令地方大員會同營員踏勘立界查明業主原契眼同發價將過稅印契彙交藩司衙門封存照造細冊分送督撫提鎮及該管衙門備案並開明地段頃畝造冊咨部存查每年應交錢糧一面由該營交納一面呈報督撫查覈互相鈐制稽查自不至有盜賣抗糧情弊所有此項山地若悉令兵丁墾種距營較遠地方不便耕作若悉令召佃取租則陝省佃種山地通例佃戶應得十分之七兵丁所得轉屬無多似非置地恤兵本意若令地方官徵收租銀報解日久弊生恐不免挪移拖欠且

租銀究非糧米令兵丁支領銀兩自行買糧輾轉
出入亦不合算臣等愚昧之見除兵丁自種之外
或覓貧民傭耕或令原佃認種均交本色糧石按
數勻給各兵豐年有餘仍報明存貯以備歉年之
用從此汙萊日闢老林漸開巡查易周兵民相習
山僻之地亦不能聚匿匪徒實於營務地方皆有
裨益至山地之段落頃畝數目及勻給各兵細數
須俟置買齊全試行耕種一年後再將一切章程
另行詳細妥定奏明報部永遠遵行謹

奏

嘉慶九年十二月初七日奉

上諭那彥成等奏籌議寧陝及漢南各鎮協新兵借項置
買地畝情形一摺據稱陝安鎮營漢中協營並陽平關
寧羌畧陽等處新兵與寧陝新兵皆須一律置買地畝
俾裕生計統計馬步戰兵八千六百一十七名每名給
與十兩價銀之地共應需地價銀八萬六千一百七十
兩請於嘉慶八年地丁項下先行借支在於節省馬乾
項下扣還並交寧陝總兵楊芳等趕緊置買兼令提督
楊遇春督率辦理等語寧陝及陝西等處新兵多係無
業鄉勇應募入伍生計未免竭蹶自當先令衣食充餘

方可一律訓練且深山老林逐漸開墾則汗萊日闢耳目易周亦不致有藏垢納汙之事所奏自屬可行著照所請每新兵一名借給地價銀十兩共銀八萬六千一百七十兩在於九年地丁項下借支並准其於節省馬乾項下分年扣還至嘉慶十五年冬季全數歸款至提督楊遇春總兵楊芳等平素帶兵打仗最爲勇往惟當責以訓練新兵至於買地納糧丈尺踏勘等事必須詳細經理且伊等所用不過營中字識等於一切事件恐不能諳習此事著酌派臬司朱勲或其餘道員內熟悉地方情形辦事結實者令其會同該提鎮詳悉籌辦務

臻妥協該部知道摺併發

嘉慶九年十月二十六日會同陝西巡撫方公維
甸

奏爲酌籌散遣山內游民以靖地方事竊南山及漢南
一帶山大林深游民裸處凡佃種山地採伐木植
之人尚有鄉約客頭寨長廂客等稽查管束其現
在散遣之鄉勇有業者悉已歸農無業者分充兵
役不虞別滋事端惟外省外縣游蕩客民無計謀
生聚集日多最易爲匪節次拏獲之匪徒除零賊
之外訊明多係游民若不亟爲清查不但搶掠案

犯一時難以肅清且游民日存山內往來卽未經
爲匪亦與匪徒相混緝捕尤難辨別自應設法散
遣以清奸宄之源伏查此項游民約有數種一係
從各營告退之新兵一係數年前革退之鄉勇一
係隨營貿易之夫役一係隨營攘竊之閒人大抵
流落南山者已革退兵勇爲多流落漢南者人夫
較衆當賊匪未平之時或受僱運糧防卡或隨營
負販營生甚或尾隨官兵搶奪賊物冒充鄉勇詐
騙酒食尚俱有趁食之處今已勒捕嚴事大兵次
第凱旋此等無籍之人謀生失所雖欲回籍力有

不能祇得三五爲羣在山內到處游蕩天氣漸次
寒冷衣食無資難保不聚而爲匪_臣等與提督楊
遇春總兵楊芳王兆夢往返札商並據興安府知
府龍萬育等查稟情形公同酌議若將山內游民
卽行查拏驅逐不但無以安置貧民轉恐激而生
事自當乘此天氣寒冷無衣無食思歸故里之時
出示開導捐給衣服口食遣送各回原籍庶可不
動聲色肅清山境弭患未萌茲先將楊遇春一路
隨營貿易人等交知府龍萬育遣送已據該府稟
稱派員各處曉諭人情甚爲踴躍情愿回籍者頗

多於十月初八初十十二等三日已遣送過一百四十餘名並有愿在楊遇春處充補額兵之人來者尚多行之已有成效其餘各路軍營皆可仿照遣送至南山內流落兵勇楊芳及所帶弁兵素多認識可以曉諭喚出卽交楊芳照此遣送辦理可期妥協所有經過沿途地方臣等已通行劄飭逐站轉送各出用印收管按名造報以憑隨時稽查謹

奏奉

硃批所辦甚好南山之內終有隱憂必得精明強幹懂事

而不生事辦事而不畏事之人方能鎮服卿等時時留意勿忽

安鄉勇以置新兵

嘉慶九年七月初八日會同陝西巡撫方公維甸

奏川省軍營隨征陝勇

臣

方維甸因不便遽行調回

奏明緩撤業蒙

俞允而額勒登保移送六月初六日所發摺稿雖稱從征鄉勇未便一時全行散遣致啟其疑而摺內復稱現擬將應撤陝勇分起送至興安漢中並接准額勒登保來函令臣方維甸卽行派員前往與該撤之意稍殊又未續奉卽撤

諭旨但恐川省軍營業將此項鄉勇送回勢難中止是以

一面飛飭興安府知府龍萬育並飭知陝安道德
明額妥協經理一面派委知府朱紱馳往邊界會
辦頃接龍萬育稟稱川省軍營征勇尚無撤動之
信惟奉額勒登保飭將王兆夢所帶之王英黃
傑鄉勇先行裁撤除入伍各名外其餘送往興安
散遣安插等語是軍營此時征勇尚在川省並未
卽行調回自應暫緩辦理惟王英等鄉勇二百餘
人旣在陝邊業經額勒登保劄知該處文武裁撤
應令該道府等查明有業無業之人按照

奏准章程分別妥辦等伏思隨征鄉勇多係游民今

給予壯丁口食餉口固所樂從第其中有桀驁不馴之人向來隨在軍營卽係利於搶掠今充壯丁仍恐畏地方官管束必有本無家業之人而詐稱有家者亦有籍隸此縣詐稱彼縣者若不詳細詢問遽行遣回仍恐去而爲匪無從稽查已嚴飭地方官逐一詢明不令稍有混冒又鄉勇改充新兵一節該勇等因守糧不敷口食往往不愿入伍自應酌給馬糧戰糧以資鈐束但入伍新兵仍當分散各營不可聚集一處並非一經歸營卽能帖服查寧陝陝安漢中各鎮協營俱有鄉勇入伍之人

隨在軍營者尚有大員管帶其存營防守新兵內
逃伍滋事皆所不免甚且潛結夥黨爲抗拒本管
官員之計兵習易驕不可不防其漸如近日寧陝
新兵雷紹唐毆斃民人甘文成一案同伍兵丁李
友清等黨護兇手膽敢不服拘拏卽此一端可爲
驕縱難制明証臣等詳察情形酌籌整飭務期新
兵咸知畏法以收鄉勇歸營實效不致再滋事端
其餘一切事宜尚須公同商辦俟臣那彥成與臣
方維甸酌籌具

奏後再行遵

臣前赴甘肅所有總督關防經藩司蔡廷衡令中軍副將
劉管城等賫送前來臣那彥成業於初六日接印
任事謹

奏

嘉慶九年七月十六日軍機大臣字寄奉

上諭那彥成方維甸會奏一摺內稱裁撤鄉勇令充壯丁
仍恐畏地方官管束又復流而爲匪至改充新兵該勇
等因守糧不敷口食往往不願入伍且歸營新兵逃伍
滋事皆所不免甚或潛結夥黨以爲抗拒本管官員之
計各等語軍營裁撤鄉勇自宜遵照歷次所定章程或

入營充伍或分派各州縣充當丁壯如兵役皆非所願則交原籍地方官妥爲安插倘有不安本分之處則該管營員及州縣地方官皆可隨時鈐束就案懲辦伊等從前隨營出力時已各酬其勞績今撤回後自當有犯必懲以消其桀驁不馴之氣若必如那彥成等之多方顧慮豈此等裁撤鄉勇竟任其散而無紀耶那彥成應仍與方維甸詳察情形妥籌辦理

容安謹按後二年陝新兵滋事經西安將軍德公楞泰等主於招撫陝西巡撫方公維甸劾其辦理失當奉

旨將德公等降黜叛兵蒲大芳等發遣新疆該兵等抵戍
復有勾結遺犯蠢動之意是時松公筠任伊犁
將軍覺察

奏悉伏誅

嘉慶九年七月二十二日會同陝西巡撫方公維
甸

奏爲體察寧陝鎮新設官兵亟須整飭調劑會籌具

奏事竊照陝省善後事宜惟安插鄉勇調劑新兵二事

最關緊要臣等前次摺內已將大概情形具

奏在案連日以來逐細體察所有撤勇事宜章程旣屬

周妥現在認真辦理已可行之無弊惟寧陝新兵營制散漫兵丁縱恣實爲隱憂不可不防微杜漸緣該鎮新設馬步守兵六千名藉以分布巡防並可安插鄉勇立意未始不善迨招募時營員只期足額未暇詳擇以致應募者或落後鄉勇或革役逃人或賭博匪棍大抵皆游手無籍之徒應名充數暫圖食糧繼因所得分例不敷養贍又復心性不定輒思他去往往上月應募下月脫逃此營逃出更名至彼營入伍營弁希圖補額不究來歷任意濫收甚至有晝則當兵夜則出而拘摸或串同

匪類劫掠以圖分肥此等桀驁之徒本難控馭若
該管營弁等能識重輕各就所轄之兵開誠化導
尚可冀其日漸月摩祇遵約束無如該弁等大半
係軍功拔補鄉勇出身習染相同本亦未能諳習
紀律將備等遂爾相率姑容卽偶有申明軍紀之
員該兵等勢孤則陽奉陰違勢衆則公然違玩甚
至有密約數十人爲一黨一人有犯羣起扛幫或
樹幟紛爭或倡言散夥該管將備幾至束手無策
不得不以好言解散以致日形驕縱此等情形操
之過急或致別滋事端然竟置之不問勢必釀成

尾大之患前此雷紹堂等之抗官滋事曾經臣方
維甸具

奏之案卽其明驗查寧陝兵丁帶出防勦者多留營差
操者少該鎮總兵楊芳久在軍營防勦並未回鎮
營制原未全定臣方維甸聞有此等情形曾經

奏明知會楊芳密查設法散歸別營並與督臣惠齡商
辦因惠齡患病日重未及辦理今臣那彥成奉

命來陝與臣方維甸日夕講求欲爲弭患未然之計一在
籌其口食一在散其徒黨竊思寧陝額兵六千內
馬兵六百名除馬乾銀不計外每名每月運米折

尚支銀二兩四錢得項較爲優厚步兵二千四百
名尚支銀一兩九錢守兵則僅支銀一兩四錢山
內食物昂貴該兵等目下不免少形拮据自應亟
籌生計使之無可藉口若多事賞號或超拔名糧
恩極則驕更難駕馭莫若仿照屯田之例寓兵於
農既可安其身家藉以消其桀驁查南山自賊匪
蹂躪之後百姓徙亡未復全業荒蕪之產多有情
願售賣者臣等已令臬司朱勲道銜陳祁等於入
山搜捕之便查看田地情形量爲置賣以備每月
添補兵糧之用所需價值動用各營截曠馬乾以

營中有餘辦理營務似尚可行若有不敷捐廉辦理或信動

帑項於所收糧石除添給兵丁外每年抽存若干按年變價歸還原款俟查明數目多寡

奏明酌辦似此兵食既足則軍政可肅約束須嚴有犯必懲並於各營張貼嚴明告示以不可犯法之條如營員將犯法之兵據實報出不妨寬其失察之咎以杜因循隱忍之弊至此等未明紀律之兵犯法懲治固其罪所應得究念曾著微勞亦覺少

有可憫然似此性情犷悍之輩常川聚集久亦終

非善策莫若散調各營其中如千把外委等員與兵丁最爲切近平日果能約束亦最爲得力若係桀驁難馴之人轉爲衆兵倡首臣等再四籌畫擬於舊有各營弁員內酌選諸習行伍者守備千總以下應請不拘例限隨地隨時量爲對調步守兵丁或酌拔他營馬糧以散其勢庶新兵管領得人足資訓練而新兵撥入舊營者亦可隨隊學習可期兩有裨益將來零匪全清之後寧陝營兵只須足數分布似不必額定六千之多於事未見有益而經費無窮亦非長久之計此後酌看地方情形

或撥歸別營或量爲裁汰凡有應須籌辦損益之處容再悉心會議妥定章程另行請

旨辦理臣等察看新兵現在情形不能不亟爲整飭調劑謹合詞縷晰詳陳伏祈

訓示遵行謹

奏奉

硃批軍機大臣妥議具奏

謹按嘉慶九年八月初二日廷寄內奉

上諭據那彥成方維甸等奏會籌整飭調劑寧陝鎮新設官兵一事此項新兵既經應募入伍卽應遵守營規有

犯必懲但該兵丁等半以游民充數罔知紀律若聚處日久難保不滋生事端自不若分散各營則勢孤而約束較易至所食錢糧或於該兵等生計不敷亦應設法添補俾免拮据則日久自可相安除將原摺交軍機大臣妥議具奏外那彥成等仍當與額勒登保熟商將該鎮新兵如何妥爲控馭或分別酌撥他營或將舊營備弁量爲對調以資管領之處悉心詳議章程再行具奏將此傳諭那彥成方維甸並諭額勒登保知之

謹按嘉慶九年八月初六日會同陝西巡撫方

公維甸

奏應撤陝省原募鄉勇係王英等所帶在陝邊防鄉勇
二百四十三名往川隨征鄉勇九百九十六名此
項在陝邊防鄉勇內情願入伍者四十一名其餘
二百二名先已飭令興安地方官等分別遣回安
插其在川隨征鄉勇有籍隸川黔等省者數百名
若俟帶至陝省再行分別遣撤未免道路紆回人
數擁擠前經札商額勒登保或由陝省派員前往
川省軍營就近辦理嗣接額勒登保覆信在川隨
征鄉勇內情願入伍者二百八十五名其餘應撤
鄉勇查明四川三百五十五名貴州一十八名額勒登

保傳已在軍營給與賞銀就近遣令回籍毋庸陝
省派員赴川照料惟陝甘楚豫等省鄉勇三百八
十八名額勒登保親帶至陝分起裁撤派員送交
興安道府並知府朱紱散遣臣等復嚴飭各該員
查照章程逐程專員護送按名點驗取具印收節
節稽查其家無恒業願充丁役之人卽已分散各
原籍州縣給與口食安插該勇等歡欣感激行走
安靜並無一名逃逸目下軍營鄉勇業已全撤由
地方官陸續接收詢明有無家業遣送安插已有
九起不日可以辦竣仍令開具籍貫花名清冊再

由各該府隨時查考彙報以期各遵約束日久相安伏祈

睿鑒謹

奏

謹按嘉慶九年八月十六日廷寄內奉

上諭那彥成等奏分起遣撤各鄉勇行走安靜辦理尚爲妥協

嘉慶九年八月二十七日會同陝西巡撫方公維
甸

奏爲軍營撤遣鄉勇地方官接收後俱已遣送到籍安

插妥協情形事竊照陝省應撤隨征鄉勇一千二百三十九名先經臣等將額勒登保分路遣撤交地方官送回安插已有九起緣由奏蒙

聖鑒

連日復據興安地方官開單具稟續又遣送鄉勇四

起連前共十三起業經全數完竣並據各廳州縣

稟報前來

臣

等按數覈查除額勒登保在川遣撤

川黔二省鄉勇三百二十三名入伍三百二十六名外其陝西交地方官分路遣送鄉勇籍隸陝西者較多計四百一十八名其餘籍隸甘肅等省者一百七十二名先在平利興安按名點驗委員妥

爲護送出具印收節節稽查甚屬安靜凡各省之人俱由邊界地方送至各該省首站交收取回用印收管其本省之人皆已回籍並無一名逃散現在報充壯丁者八十一名又外省願在陝省充當壯丁一名此外如生計維艱陸續告充丁役者亦飭地方官遵照章程准其仍復著役一體造冊具報總期永遠相安不致流而爲匪以仰副

聖主綏靖地方至意再凱旋貴州官兵九百餘員各經額勒登保飭交總兵劉瑞等分爲兩起由興安水程取道楚省回黔亦經妥爲照料出境謹

奏奉

硃批欣慰覽之

那文毅公初任陝甘總督奏議卷八